

**PROTOKOL O SARADNJI IZMEĐU  
VLADE REPUBLIKE HRVATSKE I VIJEĆA MINISTARA BOSNE I  
HERCEGOVINE U TRAŽENJU NESTALIH OSOBA**

Vlada Republike Hrvatske i Vijeće ministara Bosne i Hercegovine (u daljnjem tekstu: strane),

- na osnovu Općeg okvirnog sporazuma za mir u Bosni i Hercegovini parafiranog u Daytonu 21. novembru 1995. godine, a potpisanog u Parizu 14. decembra 1995. godine,
- želeći doprinijeti ublažavanju humanitarnih posljedica ratnih sukoba,
- potvrđujući obavezu strana da izvijeste o sudbini osoba koje su se nalazile u njihovoj vlasti ili na području pod njihovim kontrolom,
- svjesne potrebe za saradnjom u traženju nestalih osoba i ponovno afirmirajući pravo porodica da saznaju istinu o svom nestalom članu

sporazumjeli su se kako slijedi:

**I. OSNOVNA ODREDBA**

Član 1.

Ovim Protokolom uređuju se međusobni odnosi, obaveze i način saradnje nadležnih tijela Republike Hrvatske i Bosne i Hercegovine u postupku traženja osoba nestalih u sukobu na državnom području država strana, a radi učinkovitog rješavanja pitanja nestalih osoba, odnosno pronalaska i identifikacije njihovih posmrtnih ostataka.

**II. POSTUPANJE STRANA**

Član 2.

Strane će bez odlaganja, putem nadležnih tijela, poduzimati sve potrebne mjere i radnje u istraživanju sudbina nestalih osoba iz svoje nadležnosti.

U provedbi ovog Protokola nadležna tijela strana mogu dogovoriti pravila postupanja.

Član 3.

Strane će bez odlaganja razmjenjivati sve informacije vezane za rješavanje slučajeva nestalih osoba putem svojih nadležnih tijela.

Član 4.

Strana će po zahtjevu druge strane bezuslovno predati posmrtno ostatke preliminarno identificiranih nestalih osoba iz nadležnosti druge strane.

Posmrtni ostaci će biti predani najkasnije u roku 30 dana od prijema zahtjeva iz stava 1. ovog člana.

**III. POSTUPAK EKSHUMACIJE**

## Član 5.

U slučaju da jedna strana raspolaže saznanjem o mogućem mjestu pokopa posmrtnih ostataka jedne ili više nestalih osoba na državnom području države druge strane, informaciju će dostaviti drugoj strani na provjeru.

Zavisno od rezultata provjere iz stava 1. ovoga člana, svaka strana može drugoj strani podnijeti prijedlog za ekshumaciju posmrtnih ostataka.

Strane će obaviti sve potrebne provjere u okviru svoje nadležnosti i međusobno razmijeniti raspoložive informacije te odgovoriti na prijedlog za ekshumaciju u roku od 60 dana od prijema istog, a u slučaju kada se informacija pokaže vjerodostojnom u navedenom roku će započeti postupak ekshumacije u skladu sa unutarnjim pravnim propisima države strane na čijem se području ekshumacija provodi.

Izuzetno, u slučajevima kada se zahtjev odnosi na ekshumaciju posmrtnih ostataka sahranjenih u zajedničkim grobnicama, ekshumacija će se provesti u skladu sa dogovorom nadležnih tijela Republike Hrvatske i Bosne i Hercegovine.

Strana će o ekshumaciji blagovremeno obavijestiti drugu stranu koja može uputiti svoje posmatrače na mjesto na kojem se provodi ekshumacija, na državnom području države druge strane, radi prisustvovanja cijelom toku ekshumacije.

Strana koja provodi ekshumaciju o istoj može obavijestiti zainteresirane međunarodne organizacije koje djeluju na njenom državnom području i koje mogu uputiti svoje posmatrače radi prisustvovanja cijelom toku ekshumacije.

## IV. POSTUPAK IDENTIFIKACIJE

### Član 6.

Strane će razmjenjivati sve raspoložive podatke u vezi s identifikacijom posmrtnih ostataka nestalih osoba i osoba čiji se posmrtni ostaci traže, a koje su od interesa za jednu od strana.

### Član 7.

Strana će o identifikaciji blagovremeno obavijestiti drugu stranu koja može uputiti svoje posmatrače na mjesto na kojem se provodi identifikacija, na državnom području države druge strane, radi prisustvovanja cijelom toku identifikacije.

Strana koja provodi identifikaciju o istoj može obavijestiti zainteresirane međunarodne organizacije koje djeluju na njenom državnom području i koje mogu uputiti svoje posmatrače radi prisustvovanja cijelom toku identifikacije.

### Član 8.

Strane će sarađivati u obavještanju porodica koje se pozivaju na identifikaciju posmrtnih ostataka nestalih osoba, a u obavljanju poslova iz ovog člana sarađivat će s predstavnicima međunarodnih organizacija koje su uključene u ovaj postupak.

## V. ZAVRŠNE ODREDBE

### Član 9.

Ovaj Protokol stupa na snagu datumom prijema posljednje pisane obavijesti kojom se strane međusobno obavještavaju, diplomatskim putem, o ispunjenju njihovih unutarnjih pravnih uslova za njegovo stupanje na snagu.

Ovaj Protokol sklapa se na neodređeno vrijeme.

### Član 10.

Svaka strana može u svako doba otkazati ovaj Protokol pisanom obavijesti drugoj strani, diplomatskim putem u kom slučaju ovaj Protokol prestaje devedeset (90) dana od datuma prijema obavijesti o otkazu.

Prestanak ovog Protokola ne utiče na završetak aktivnosti i obaveza započetih u skladu sa odredbama ovog Protokola, a koje u trenutku prestanka nisu završene, osim ako se strane ne dogovore drugačije.

### Član 11.

Ovaj Protokol se može izmijeniti i dopuniti u svako doba uzajamnim pisanim pristankom strana, a izmjene i dopune stupaju na snagu u skladu s postupkom propisanim u članu 9. stav 1. ovog Protokola.

Sastavljeno u \_\_\_\_\_ dana \_\_\_\_\_ u dva primjerka, svaki na hrvatskom jeziku i službenim jezicima Bosne i Hercegovine (bosanskom, hrvatskom i srpskom jeziku), pri čemu su svi tekstovi jednako vjerodostojni.

ZA VLADU REPUBLIKE HRVATSKE

ZA VIJEĆE MINISTARA BOSNE I HERCEGOVINE